



Ad alt, Il tumul di S.Svualt il dì de inaugurazion. Parsore, La sepulture dentri dal tumul.

Archeologjie in Friûl

Screât pal public il tumul protostoric di Sant Svualt

I teritori furlan al conserve inmò in di di vuê testimoniancis impuartantis dal so passât, ançe di chel plui antic. O lin di fat a fevelâ di un event che al à segnât un pas fondamentâl te ricercje protostoriche de nestre region, la vierzidure al public dal tumul funerari di S.Svualt (Udin). Vinars ai 14 di Otubar di fat e je stade inaugurade la struture che e permetarà di visitâ la sepulture in grazie a un moderni sisteme di jentrade.

CE SONO I TUMUI. Ricuardin che i tumui a son sepulturis de antighe ete dal Bronç, tal câs di S.Svualt o fevelin dal 2000-1900 d.d.C., fatis sù ator dal defont in pierre e glerie e che a rivavin a une altece di 4-5 m e un diametri di 25 m cirche. Pensant ai tumui a vegnin subito iniment lis tombis etruschis o i *tholoi* miceneus, pe lôr forme carateristiche. Ator pal Friûl si cjatin cetancj di chescj esemplis di sepulturis, ançe se in di di vuê tancj di lôr a son stâts splanâts cence vêju studiâts prime, gjavant cussì la pussibilitât di un studi plui profund su cheste evidence archeologjiche uniche tal nestri teritori.

LA STRUTURE. Come che si diseve la struture moderne fate sù par dâ acès ae sepulture e je stade studiade in maniere di violâ mancûl pussibil il manufat e soreud di dâ la pussibilitât di visitâ la tombe come "jentrant" te stanzie dulâ che si cjate il muart.

A diference des tipologiis di tombis che si diseve prime di fat, in chês furlanis nol jere previodût un ambient interni di acès, ma ben dome il spazi par dâ acet al defont. Cumò invezit si pues viodi il cuarp, la cuvierture di glerie e ançe la stratigrafie complete dal tumul, come se si viodès un sgiâf archeologjic in cors di opere.

CUI JERIAL DENTRI? Il muart deponût dentri dal tumul, che si stime al sedi l'om furlan plui antic cjatât fint cumò, al jere alt cirche 1,70 m e di 25-35 agns di età. Dongje nol veve un furniment, se no altri di ogjets che si sedin conservâts, metût sul flanc di çampe e il cjâf bande sud-est. La datazion al Carbonio14 e à permetût di datâlu tor dal 1920 d.d.C. te fase medie de antighe ete dal Bronç.

La impuartance di cheste scuvierte e de sò musealizazion e je evidente, e lasse cetant materiâl di studi pai agns a vignî che al podarès sburtâ la ricercje archeologjiche te nestre region inserintle intun contest une vore ampli, parcè che o ricuardin che tumui di cheste fate a son sparnciâts ator par dut il nestri teritori.

VISITIS VUIDADIS. Al è za pussibil prenotâ lis visitis vuidadis clamant i Museus Civics di Udin il lunis des 10 aes 13 e des 14 aes 17 a chest numar: 0432 271767 o pûr il Studio D Friuli il martars e il joibe des 10 aes 17 al numar 346 3257139.